




Listovi

"Listao"
Omer Hamzić

Listovi gračaničkog kalendara od 9.11. 2000. do 13.5.2001.

9.11.2000.

**Asfaltni put Klokočnica – Lukavica,
dužine 4,5 km, zvanično pušten u
saobraćaj**

To je veliki događaj za stanovništvo Lukavice, Lukavice Rijeke i Sjenine u koju se polahko vraćaju njeni prijeratni žitelji. Asfaltni izlaz u svijet dobio je veći dio Trebave, koji se prostire na teritoriji dvije opštine u Federaciji (Gračanica i Doboj Istok) i opštine Doboj (u Republici Srpskoj).

Vlada Tuzlanskog kantona u taj projekt uložila je 1,5 miliona KM.

12.11.2000.

**Naličje povratka Srba u Gračanicu:
prodaja imovine ili čekanje bolje
cijene, jedna statistika**

Nadležnoj općinskoj službi – Odjeljen-je za stambena pitanja do ovog datuma podneseno je ukupno 246 zahtjeva za povrat stanova. Pozitivno rješenje dobila su 133 lica sa stanarskim pravom. Za povrat kuća podneseno je 435 zahtjeva, izdato 313 rješenja, 134 kuće vraćene su ranijim vlasnicima, rješavanje ostalih zahtjeva je u toku.

Od 134 vraćene kuće, useljeno je svega 7 u Gračanicu i jedna u Donjoj Lohinji, dok se u Lendiće i Gornju Lohinju nije vratio ni jedan prijeratni stanovnik. Riječ je o Srbima, prijeratnim stanovnicima Gračanice, koji se, uglavnom, ne vraćaju, već radije svoje kuće i stanove drže zaključane ili ih prodaju.

13.11.2000

Gračanički «Olimp»: obezbijeden posao za sezonu proljeće – ljeta

Radi se uglavnom o takozvanim lon-poslovima za jednu njemačku i dvije slovenačke firme s kojima su već sklopljeni odgovarajući aranžmani. Ipak, tržište i dalje ostaje glavni problem ove gračaničke firme koja zapošljava oko 500 radnika.

14.11.2000.

Obilježavanje šehidskih mezarja na području gračaničke opštine

Ovu aktivnost već treću godinu vrlo uspješno vodi Opštinska organizacija porodica šehida i poginulih boraca uz pomoć Vlade Tuzlanskog kantona i opštine Gračanica. Jedinstveno uređeni nišani postavljeni su na šehidska mezarja u Doborovcima, Gornjoj Orahovici, Stjepan Polju, Malešićima, Pribavi i Miričini. Do kraja ove godine planirano je uređenje šehidskih mezarja «Šabuša» u Gračanici i mezarja u Lukavici.

Pored uređenja šehidskih mezarja, na lokalitetu Vis, zatim u Malešićima i Babićima već su urađena spomen-obilježja, dok je u toku gradnja skromnih spomenika u Lukavici i Džakulama.

21.11.2000.

ZZ «Gračanka»: počela sadnja maline

Radi se o početku realizacije programa sadnje jagodičastog voća (jagode, maline i kupine) na površini od oko 45 hektara oko kojeg «Gračanka» okuplja 150 domaćinstava na području opštine Gračanica. Uz povoljne kredite «Gračanka» obezbjeđuje sadnice, žicu za takozvane špalire, mineralno đubrivo i sredstva za zaštitu bilja, dok domaćinstva obezbjeđuju radnu snagu i zemljište. Kako je izvijestio Hasan Čalić za Radio Gračanicu, sadnja malina

počela je u Malešićima i Donjoj Lohinji, a proizvodnja matičnjaka malina na 5 dunuma bit će obavljena u Sokolu.

Imajući u vidu da je plasman jagodičastog voća već obezbijeden u preradivačkim kapacitetima «Vegafruta», ova proizvodnja, gotovo potpuno nova na području opštine, zainteresovala je mnoge poljoprivredne proizvođače koji u njoj prepoznaju dobar i profitabilan posao.

21.11.2000.

Općina Gračanica: stop bespravnoj gradnji

To je odluka nadležnih službi općine Gračanica koje su, barem na riječima, odlučne da zaustave cvjetanje bespravne gradnje na području opštine, a posebno u samom gradu Gračanica. Prema zvaničnoj statistici, od 1996. do 2000. godine, evidentirana su 43 bespravno izgrađena objekta.

U okviru nadležnih organa preduzimaju se sve potrebne mjere da se zakonski sanira ono što se zakonski može legalizovati, odnosno sanirati, ali morat će se primijeniti i krajnja mjera: rušenje. Općina je već na tenderu odabrala odgovarajuću firmu koja je osposobljena za rušenje bespravno izgrađenih objekata. Još se ne zna ko je prvi na redu.

25.11.2000.

Najtužniji dan u Grapskoj: sahranjene 33 žrtve rata

Zajedničkoj dženazi za 33 pronađene i identifikovane žrtve rata, mučki ubijene 10. maja 1992. godine u Grapskoj, prisustvovalo je više od dvije hiljade ljudi, članova porodica ubijenih, komšija i prijatelja koji su došli da se oproste od svojih najmilijih. «Slabo učimo lekcije, a brzo zaboravljamo. Bez dolaska pravde na ove prostore, bit će nepravda pred ovim nevinim žrtvama rata.

Obično se u ovakvim prilikama pitamo: hoćemo li halaliti umrlima. Ja sad pitam vas – hoće li oni halaliti nama? Islam ne traži da se iko sveti. Međutim, u islamu nema ni halala ni oprosta dok pravda ne dođe. Bez pravde nema ni suživota, »rekao je naibureis Ismet ef. Spahić, obračavajući se prisutnima nakon klanjanja zajedničke džezaze postradalim Gračanima.

27.11.2000.

Opći izbori 2000: Gračanica «osvojila» 6 poslaničkih mandata

U Skupštinu Tuzlanskog kantona izabrani su: Sead Čaušević (SDP), Nusreta Ustavdić (SDP), Senada Gazibegović (SDP) i Muhamed Ibrahimović (SDA); u Parlamentarnu skupštinu Federacije BiH izabrani su: Reuf Sokolović (SDP), Amira Bravić (SDP) i Bilal Begović (SDA).

27.11.2000.

Osnovana Turistička zajednica Gračanica

Na osnivačkoj skupštini usvojen je Program rada i Statut ove asocijacije, te njeni organi i tijela. Za predsjednika Turističke zajednice i predsjednika Turističkog vijeća od 5 članova izabran je Nusret Helić iz Gračanice. Pored Helića, članovi Vijeća su: Šahzija Mrkonja, Bećir Tihić, Kemal Helić i Ekrem Fazlić. Donesena je i odluka o osnivanju i ustroju Turističkog biroa u Gračanici. Time su stvorene organizacione pretpostavke za dalji razvoj turističko-ugostiteljske ponude na području ove opštine.

28.11.2000.

Humanitarna pomoć njemačke vlade - u pravo vrijeme, na pravo mjesto

Posredstvom Ureda za repatrijaciju BiH, a na osnovu programa koji je ponudila općina Gračanica, njemačka vlada upu-

tila je najugroženijim prognanicima, pezionerima sa niskim primanjima i takozvanim primaocima socijalne pomoći 2.033 zimske jakne, 2.033 čebadi, 1.128 tona uglja i 1.128 prostornih metara ogrjevnog drveta - da lakše prebrode predstojeću zimu. Podjela ovog velikog humanitarnog paketa vrši se putem nadležne službe i stiže u sve dijelove općine Gračanica.

30.11.2000.

Šesta sjednica Općinskog vijeća: o stanju općinske urbanističko-prostorne dokumentacije i budućim potrebama

Prostorni i strateški planovi predstavljaju načine upravljanja budućnošću, pa je ovom pitanju Općinsko vijeće posvetilo odgovarajuću pažnju. Od razvojnih planova, do 2000. godine na području ove općine doneseni su: nacrt prostornog plana, urbanistički plan grada, urbanistički redovi za mjesne zajednice uz regionalne puteve (Miričina, Donja Orahovica, Pribava, Donja Lohinja, Stjepan Polje i Doborovci). Od provedbenih (detaljnih) planova doneseni su regulacioni planovi za područje grada «Centar», «Jug I», «Korića Han», «Varoš» i «Drafnići», te sanacioni plan «Drafnići». Za neke dijelove grada doneseni su i koriste se idejna rješenja regulacionog plana (Lipa – Čiriš – Varoš – Industrijska zona) kao i planovi parcelacije. Bio je donesen i urbanistički plan za termalne vode kao i regulacioni plan za to područje.

Iako su ovi planovi doprinijeli unošenju više reda u oblasti izgradnje, ipak se provođenje planova odvijalo dosta stihijski i neorganizovano jer nije praćeno adekvatnim programima i drugim mjerama, što se posebno odnosi na organizovano rješavanje saobraćajnica i druge infrastrukture kao preduslova za plansku izgradnju objekata i naselja, rješavanje javnih, zelenih i drugih


površina, parking prostora itd.. stoga se i osjeća potreba za mijenjanjem i dopunjavanjem većine planova sa aspekta namjene zemljišta, područja obuhvata, potrebe usaglašavanja saobraćajnica itd. Stoga je Vijeće zaključilo da se u narednoj godini pristupi izradi i donošenju Prostornog plana općine i Urbanističkog plana grada kao osnovnih razvojnih planova. Bit će to značajna pretpostavka za dinamiziranje procesa obnove i razvoja i definisanje prostorno-plan-skih rješenja na opštini na duge staze.

Na ovoj sjednici Vijećnici su prihvatili Nacrt Budžeta općine za 2001. godinu, informaciju o uspjehu učenika osnovnih i srednjih škola na području općine u 1999/2000. školskoj godini, informaciju o provedenim općim izborima i usvojili Odluku o stipendiranju studenata.

6.12.2000.

Na inicijativu «Gračaničkog glasnika», osnovana Asocijacija za zaštitu kulturno-historijskog naslijeđa i podsticanje naučnog i kulturnog stvaralaštva «Soko» Gračanica

Usvojeni su osnivačko-programski dokumenti ovog jedinstvenog udruženja građana koje će podstaknuti nadležne institucije da više pažnje nego do sada poklanjaju našem kulturno-historijskom naslijeđu, a posebno objektima koji pred



MONOS
Izdavačko-izdavačko društvo d.o.o.

Časopis
«Gračanički glasnik»
- Redakcija -
75320 Gračanica, Bosna i Hercegovina
Ulica Muse Čazima Čavča 18

Telefon: ++387 35 788 323
GSM: 066 179 390
Broj: 036/00
Datum: 1. 12. 2000.

Uvaženi poštovani,

Razmatrajući na Redakciji Časopisa "Gračanički glasnik" autorski materijal dvojice naših članova (Djedović, Hamzić) pod naslovom "Programska osnova za formiranje i djelovanje Fondacije za zaštitu i valorizaciju kulturno-historijskog jezgra srednjovjekovnog grada Šokola kod Gračanice", zaključili smo da pokrenemo inicijativu za formiranje "Fondacije za zaštitu kulturno-historijskog naslijeđa i podsticanje kulturnog stvaralaštva" na području općine Gračanica pod nazivom "Fondacija "Soko" Gračanica. Ta je Fondacija zamišljena kao nevladina organizacija - udružene građana, čije bi se aktivnosti finansirale prekovremeno sredstvima međunarodnih donatora, a samo djelomično iz domaćih fondova i lokalnih sponzora.

Sagledavajući kratkoročne zadatke koji stoje pred nama oko formiranje te organizacije, kao i njenu buduću aktivnost "na duge staze", ludi snu slobodu da i Vas predložimo u sastav inicijativnog odbora za formiranje Fondacije "Soko" Gračanica.

Nadamo se da ćete uzeti učešće u ovom poslu i dati svoj lični doprinos u realizaciji krupnih zadataka koji stoje pred ovom organizacijom.

Ujedno Vas i pozivamo na prvu konstituirajuću sjednicu Inicijativnog odbora za formiranje Fondacije "Soko", koju će se održati u SRJEĐU, 6. 12. 2000. godine u sali Općine Gračanica (između) na početku u 18.00 sati. Za prilugu Vam dostavljamo pomoćni materijal.

Vas odziv na sjednicu znak je da ste saglasni sa učešće u radu Inicijativnog odbora i budućih organa Fondacije. Bilo bi nam drago da Vas dolazak potvrdite ili opravdan izostanak najavite na tel. 066 179 390 (Emir Hamzić) ili 066 154 007 (Rusmir Djedović) kako bismo lakše organizovali ovaj skup.

S poštovanjem!

 Izvršni urednik
Časopisa
"Gračanički glasnik"
Emir Hamzić

Poziv za prvi sastanak Inicijativnog odbora Asocijacije "Soko"

našim očima nestaju i propadaju. To se prije svega odnosi na srednjovjekovni grad Šoko i još neke kulturno-historijske spomenike na području opštine. Za predsjednika Skupštine ove Asocijacije zabran je Abdulaziz Ahmedbegović, dopredsjednik je Hajrudin Junuzović, a sedmočlani Upravni odbor čine: Rusmir Djedović (predsjednik Upravnog odbora i Asocijacije), Sead Jahić (dopredsjednik), Osman Topčagić (sekretar), Osman i Hasan Puškar i Muhibija Delić.

6.12.2000.

«Veko» - nova firma iz oblasti poljo-privrede

Tu su firmu zajedničkim snagama osnovala «Vega fruit» iz Brijesnice i «Kokaprodukt» iz Gračanice. Firma će raspolagati sa 45 hektara zemljišta na kojem će proizvoditi voće i povrće za potrebe «Vega fruita», kao i za tržište. Od voća, već su nabavljene sadnice višnje, maline, jagode i kruške, a u plastenicima je planirana proizvodnja rasada i ranog povrća. Izvršeno je kultivisanje zemljišta i dubrenje, a u toku je duboko oranje i priprema za sjetvu. Izgradnjom bazena, obezbijedena je i voda za navodnjavanje.

Kako je za Radio-Gračanicu izvijestila Rašida Đulić, u ovoj firmi posao je dobilo 20 radnika «Kokaprodukta», a prvi prinosi se očekuju već naredne godine.

9.12.2000.

Gračanica bez vode – redukcije kad im vrijeme nije

Uslijed dugotrajne suše i krajnje nepovoljne hidrološke situacije, problem snabdijevanja pitkom vodom sve se više zaoštrava. Vode je u cijevima sve manje, a redukcije su sve duže. Od 24 sata, potrošači imaju vodu svega 8 sati, četiri sata ujutro i četiri sata naveče. Slična situacija je širom opštine - i još gora.

10.12.2000.

Gračanlija Dževdet Tinjić: prvi Bosanac najuspješniji menadžer Hrvatske

Između 24 ovogodišnja kandidata u kategoriji malih preduzeća, Profesionalna udruga menadžera «Croma» prestižnu titulu menadžera godine Hrvatske dodijelila je Gračanliji Dževdetu Tinjiću, koji je svoju karijeru započeo kao voditelj prodaje

građevinske opreme u gračaničkom preduzeću «Fering» da bi se prije petnaestak godina «otisnuo» u Zagreb i «u tom velikom središtu male i velike privrede, biznisa i trgovine» 1989. godine osnovao preduzeće «Megatti» za proizvodnju boja, lakova i drugih kemijskih proizvoda. Uprkos mnogobrojnim teškoćama, firma se naglo razvijala: od početnih 30 tona kemijskih proizvoda, danas godišnje proizvodi oko 1.200 tona, pretežno boja i lakova u asortimanu od oko 150 raznih proizvoda. Prije dvije godine «Megatti» podiže tvornicu boja i lakova u Ilijašu, (investicija od 5 miliona DM), potom ulazi u poslove u Beču itd... Prestižno priznanje – još jedan podstrek ovom uspješnom Gračanliji «u bijelom svijetu».

12.12.2000.

Povratak na dobojske strane

Kako je za Radio-Gračanicu izvijestio Hasan Čalić, u sedam velikih sela u zapadnom dijelu sadašnje opštine Doboj (Grapska, Sjenina, Suho Plje, Svjetliča, Porječje, Potkamen i poljice) u ovoj godini vratila su se 1.703 stanovnika u 512 domaćinstava. Najmasovniji povratak ostvaren je u Sjeninu (220 porodica) i Grapsku (190 porodica).

Obnovu kuća pomogle su: Švedska humanitarna organizacija «SRSA», Finska humanitarna misija, «Vorld vižn» i «Muslim eid».

14.12.2000.

«Eurogalant», gračanički proizvođač kožne galanterije počeo gradnju nove proizvodne hale

...u kojoj će već iduće godine 70 radnika ovog vrijednog kolektiva imati mnogo bolje uslove za rad i što je najvažnije - neće biti više podstanari.

Poslovi za prvih šest mjeseci naredne godine već su ugovoreni. Bit će to kao i do sada izvoz za poznatog ino-kupca.

21.12.2000

**Narodna i univerzitetska biblioteka
Tuzla: konferencija za štampu
povodom desetog broja
«Gračaničkog glasnika»**

Pored članova Redakcije, koji su govorili o koncepciji i daljim planovima Časopisa, novinarima se obratio i naš poznati književnik Nijaz Alispahić, čiji su stihovi i neki odlomci iz proze objavljeni u književnoj rubrici ovog jubilarnog broja Časopisa. Uputivši čestitke izdavaču, redakciji i svim saradnicima koji pomažu i rade na ovom projektu, Alispahić je Časopisu poželio dugovječnost i «sretan put u budućnost». Biranim riječima o Časopisu je govorila i direktorica Narodne i univerzitetske biblioteke g-đa Enisa Žunić.

24.12.2000.

«VF» - novo u gračaničkoj trgovini

Riječ je o uglednoj sarajevskoj trgovačkoj kući «VF», koja je zakupila i adaptirala bivši salon namještaja «Ozrenke» (Stari «Olimp») i na oko 900 kvadratnih metara otvorila moderno uređen i opremljen supermarket sa bogatom ponudom od oko 9.000 artikala. U ovom velikom trgovačkom objektu posao je našlo 20 bivših «Ozrenkinih» i 30 novoprimljenih radnika. Prema riječima direktora Jasmina Selmanagića, svoj prostor na tržištu Gračanice ova firma osvajati će kvalitetom ponude, ljubaznošću osoblja i niskim cijenama. Sa tom jednostavnom trgovačkom strategijom i sloganom «užitak u kupovini» postigli su pravi «bum» i u drugim gradovima. Nema razloga da to ne ponove i u Gračanici.

26. 12. 2000.

**Sedma sjednica Općinskog vijeća:
usvojen program rada Vijeća,
Izveštaj o radu i Program rada
općinskog načelnika**

...te Odluka o privremenom finansiranju Općine od 1.1. -31.3.2.001. godine, projekti obnove infrastrukture, objekata javnih ustanova, obnove privrede i kolektivne stambene izgradnje, odluka o privremenom zauzimanju javnih površina, o pristupanju izradi prostornog plana općine Gračanica, o osnivanju Javne ustanove «Apoteka» (koja se izdvaja iz Doma Zdravlja), izvještaj o radu Općinskog tužilaštva za 9 mjeseci prošle godine i informacija o stanju u oblasti kulture na općini Gračanica.

Program rada općinskog načelnika zasniva se na sljedećim načelima. «1 Podsticanje privrednog oporavka u skladu sa nadležnostima i mogućnostima općine, posebno malog i srednjeg biznisa; 2. Organizaciono-kadrovska konsolidacija općinskih službi s ciljem što efikasnijeg ostvarivanja prava i sloboda građana, opremanje službi i pojeftinjenje njenog rada (potpuna primjena imovinskih zakona, povratak izbjeglih i raseljenih lica; sigurnost građana – održavanje opće stabilnosti, deminiranje određenih područja i saniranje klizišta); 3. Usklađivanje razvoja pojedinih društvenih djelatnosti sa realnim mogućnostima Budžeta Općine (kultura, sport), te finansiranje konkretnih projekata, a ne institucija; 4. Finansiranje projekata obnove i razvoja po mjesnim zajednicama vršit će se prema već utvrđenim kriterijima i po realnom ostvarenju budžetskih sredstava, kao i iznalaženje i drugih izvora sredstava (kredit, donacije, sredstva građana).

28.12.2000.

Gračanlija Meho Bašić: prvi doktor poljoprivrednih nauka iz oblasti peradarstva u BiH iz direktne proizvodnje

Doktorsku disertaciju pod naslovom «Hranljiva vrijednost koncentriranih smjesa u tovu pilića i njihov uticaj na rezultate tova u ovisnosti od dužine tova» odbranio je na Poljoprivrednom fakultetu u Sarajevu. Na Odsjeku stočarstvo sarajevskog poljoprivrednog fakulteta diplomirao je 1985. sa ocjenom 9,75 i magistrirao 1991. godine, takođe sa visokom ocjenom – 9,77. Po završetku studija zanat je pekao u gračaničkom «Kokaprojektu», a kasnije i u vlastitoj firmi «Agrozem». Radeći u neposrednoj proizvodnji, kako je izjavio za «Dnevni avaz», intenzivno je tražio odgovore na pitanje kako skupu zamijeniti jeftinijom stočnom hranom, kako skratiti period ishrane, ali ne na uštrb kvaliteta. Te je odgovore uspio sistematizovati i u svojoj doktorskoj disertaciji dokazati da se primjenom određenih metoda u peradarstvu, naravno uz sve ostale pretpostavke, mogu ostvariti goleme uštede i tako povećati rentabilnost te proizvodnje.

12.1.2001.

Izgorjela stara apoteka (Akifovce kuća)

Na placu koji je kupio od Mujage Kučukalića, objekat apoteke i uz njega stan za apotekara podigao je čuveni gračanički apotekar Johan Stanislav Njemčik, porijeklom Čeh 1912. godine. Nakon Prvog svjetskog rata, apoteku je kupio magistar farmacije iz Zagreba Akeksandar Grlić, potom Lutvo Muftić itd. U toj kući rođen je Danko Grlić, jedan od najvećih hrvatskih i evropskih filozofa-estetičara, otac poznatog hrvatskog reditelja Rajka Grlića.

To je, dakle, jedan od najstarijih objekata ambijentalne vrijednosti u Gračanici, koji ima svoju zanimljivu povijest, a i danas atraktivan izgled. Stara apoteka i Ahmed-pašina džamija jedina su dva potkupska objekta u Gračanici.

Srećom, požar nije u potpunosti uništio objekat, pa se može očekivati da će biti revitaliziran i saniran. Neće valjda doživjeti sudbinu Hadžića kuće i još nekih objekata koji su činili dušu gračaničke čaršije i, nažalost, zauvijek nestali uslijed naše nemarnosti, neznanja, nebrige i ... (P.S. nastavak je za neki drugi i drugačiji eglen).

13.1.2001.

Otvoren novi most Miričina – Porječina preko rijeke Spreče

To je četvrti most, koji su međunarodne snage SFOR-a obnovile na rijeci Spreči. Ovaj je obnavljala Nordijsko-poljska brigada. Bila je skromna svečanost, uz prisustvo zvaničnika i građana s jedne i s druge obale. Nekada su s te strane letjele granate, danas dobre želje. Otvaranje mosta obradovalo je Miričane, koji imaju (oko) 180 dunuma «s one strane Spreče», dok Porječani preko tog mosta izlaze na magistralni put Doboj-Tuzla i dalje u svijet.

Obraćajući se prisutnim, na otvaranju ovog mosta, načelnik opštine Gračanica Senahid Šaković je, između ostalog rekao i ovo: «Podizanje mostova i njihov darivanje ljudima s ciljem da se susreću i prelaze sa jedne obale na drugu obalu, uvijek je bio čin dostojan divljenja – opjevan i opisan u mnogim umjetničkim djelima, od najstarijih vremena do danas. Za nas koji živimo na dvije obale Spreče, današnje puštanje u saobraćaj ovog mosta više je od simbolike. Zašto? Zato što spaja dvije obale i ljude, što najkonkretnije otvara i širi prostore ekonomske i svake druge kooperacije i saradnje, suživota i tolerancije, kojoj teže svi nor-

malni i dobronamjerni ljudi u ovoj zemlji – nasuprot raznoraznim podjelama, izolaciji, samodovoljnosti, netrpeljivosti. Ovakvi objekti najbolji su dokaz da snage destrukcije ovdje nemaju šansi. Dolazi vrijeme razumnih, pametnih, konstruktivnih, a prije svega vrijednih ljudi koji zaslužuju da u ovoj zemlji žive od svog rada, u miru, slozi i suživotu.»

16.1.2001. godine

Zemljoradnička zadruga «Gračan-ka»: dobar bilans 2000.

Sa svojim kooperantima proizvela je i plasirala na tržište oko 500 tona povrća i 600 hiljada litara mlijeka. Da nije bilo nezapamćene suše bilo bi dvostruko više. Dvostruko veću proizvodnju planiraju u ovoj godini. Zaokružili su i projekt sadnje jagodičastog voća, javio je Radio-Gračanica.

17.1.2001.

Faruk Širbegović predsjednik Menadžerske asocijacije

Asocijacija je formirana na inicijativu časopisa «Biznis magazin», koji već 10 godina proglašava najbolje menadžere na prostoru Federacije Bosne i Hercegovine. Prema anketi «Biznis magazina», Širbegović se više puta plasirao među 10 najboljih. Taj elitni status zadržao je i u 2000. godini.

26.1.2001.

Senahid Šaković, načelnik Opštine Gračanica – novi predsjednik Vlade Tuzlanskog kantona

To je odluka novog guvernera (predsjednika) Tuzlanskog kantona Selima Bešliagića, koju je prihvatila i Skupština Tuzlanskog kantona. Budući da su u javnosti kružile neke sasvim druge kombinacije, nominacija Šakovića za prvog ministra u Vladi Tuzlanskog kantona primljena je sa ne malim iznenađenjem.

Na prijedlog Bešliagića imenovana je i Vlada kantona koju čine kandidati SDP i S BiH. Senahid Šaković će svoju «veliku utakmicu zaigrati» sa ekipom u sljedećem sastavu: ministar pravde je Mediha Bakalović iz Tuzle, rudarstva i energetike dr. Refik Ahmedinović iz Tuzle, urbanizma Slavko Stijepić iz Tuzle, unutrašnjih poslova Muhamed Čaušević iz Kladnja, za boračka pitanja Ševalija Đulić iz Gradačca, poljoprivrede i šumarstva Tomo Babić iz Srebrenika (svi iz SDP), za finansije Sead Bećirović iz Srebrenika, zdravlja dr. Nedret Mujkanović iz Tuzle, rad i socijalnu politiku Spomenka Mičić iz Tuzle, obrazovanja Enes Duvnjaković iz Lukavca i obnove i razvoja Sead Mujanović iz Živinica (iz S BiH). Imenovanje predloženog ministra za trgovinu Almazage Čatovića iz Lukavca je odgođeno zbog «provjere stambenog statusa».

Od ukupno 33 prisutna poslanika (dva su bila odsutna), 25 ih je ukazalo povjerenje Šakoviću, dok je 8 bilo uzdržanih. Za ministre je glasalo 20 vijećnika, a 13 ih se uzdržalo.

Govoreći o budućim ciljevima svoje Vlade novi premijer je, zahvaljujući se na povjerenju, posebno podvukao: «

Učvršćivanje i afirmacija pravne države u svim njenim segmentima, te stvaranje pretpostavki za njenu ekonomsku i svaku drugu samoodrživost, glavni je cilj kojem ćemo podrediti sve svoje aktivnosti u narednom periodu. Da bismo se bar približili tom cilju, moramo efikasno ovladati svim polugama vlasti koje nam stoje na raspolaganju. Drugim riječima, ova Vlada će učiniti sve da vlada – naravno po zakonima i propisima koji joj stoje na raspolaganju, te prema intencijama i zahtjevima ove Skupštine, odnosno građana Kantona. Ova Vlada će to moći jer je i sama formirana po slovu Ustava i po propisanoj proce-

duri u Kantonu, a ne po nečijoj privatnoj želji ili inicijativi.

Možda nije prilika, a možda i jeste da u ovom trenutku kažem da ćemo učiniti napor ka afirmaciji kantonalne vlasti, koja je, što svojom krivicom, što krivicom drugih, u proteklom periodu izgubila mnogo u očima građana. Naš je zadatak da kantonalnu vlast reafirmišemo, približimo građaninu, stavimo je u njegovu funkciju, u zaštitu njegovih interesa. Naravno, to je lahko reći, bit će mnogo teže to i ostvariti.

Šta hoću da kažem: Veliki zadaci stoje pred kantonalnim ministarstvima i službama, posebno kontrolno-izvršnim i inspekcijskim. Učinit ćemo sve da kantonalnu upravu podignemo iz jedne kontinuirane poslijeratne defanzivne, odbranaške, rekao bih ugodne pozicije – u jedan visok stepen aktiviteta, u ofanzivu za zakonitost red.

Naravno, to podrazumijeva prestrukturiranje, kadrovsko jačanje i educiranje, opremanje i osposobljavanje kantonalne uprave, njenu bolju, efikasniju i racionalniju organizaciju, modernizovanje upravljanja i rukovođenja itd. Sve to mora biti u funkciji ostvarivanja reda i zakonitosti. Uostalom, građanima moramo garantovati ličnu, imovinsku i svaku drugu sigurnost. Ova vlast će biti u narodu poštovana, da ne kažem popularna u onoj mjeri u kojoj sprovodi zakon.

Kad govorimo o našim prioritetnim ciljevima, nisam bez razloga akcenat stavio upravo na tu izvršnu, operativnu funkciju vlasti. Ona je preduslov, naravno u dugoročnom smislu, za funkcionisanje pravne države, a kratkoročno za konsolidaciju kantonalnog budžeta. Sva naša nastojanja u toj oblasti moramo podrediti efikasnijem ubiranju poreza. Istovremeno sa efikasnijim ubiranjem poreskih, odnosno budžetskih prihoda, putem resornih ministarstava mi

ćemo u postupku izrade Budžeta za 2001. godinu preispitati budžetsku potrošnju "po svim korisnicima" – sve u cilju stabilizacije i nesmetanog funkcionisanja svih državnih i drugih institucija koje su po zakonu "na Budžetu" Kantona. U tome očekujemo punu podršku Kantonalne skupštine i svih građana Kantona.»

7.2.2001. godine

Dugoročna dozvola IMC za Radio-Gračanicu

Nakon rigoroznih provjera i testiranja elektronskih medija, dugoročnu dozvolu dodjeljuje Nezavisna komisija za medije (IMC), koja ima mandat da stavi ključ u bravu svim medijskim kućama čiji programski i ekonomski status nije usklađen sa odgovarajućim evropskim standardima. U prvom krugu, na prostoru tuzlanske, zeničke i banjalučke regije «ispit je položilo» svega 15 radio i 4 TV kuće, dok će se pred zatvaranjem naći 27 radio i 15 TV stanica. Zahvaljujući svojoj programskoj profilaciji i riješenim tehničko-statusnim pitanjima, gračanički radio ostaje i dalje u «prvoj ligi».

2.2.2000.

Osma sjednica općinskog vijeća

Gračanica: vijećnički «front odbijanja»

Pošto su dali «razrješnicu» dosadašnjem načelniku općine Senahidu Šakoviću, koji je izabran za predsjednika vlade Tuzlanskog kantona, vijećnici su bez diskusije usvojili informaciju o realizaciji zaključaka i odluka donesenih na općinskom vijeću u periodu od maja do decembra 2000. godine, iako se očekivalo da će ta «materija» pobuditi njihovu veću pažnju budući da dobrim dijelom obrađuje njihov «metoda i sadržaj» rada i stepen njihove odgovornosti pred biračima. Međutim, znatno duže se diskutovalo «po» informaciji o stanju bezbjednosti na području Policijske uprave

Gračanica u prošloj godini, prijedlogu programske šeme Radio-Gračanice za ovu godinu i o nestručnoj zastupljenosti nastave i opremljenosti nastavnim sredstvima osnovnih i srednjih škola na području općine Gračanica. U vezi sa te tri tačke dnevnog reda, među vijećnicima se «stvorio front odbijanja», glasalo se po prijedlozima i amandmanima, od kojih ni jedan nije dobio potrebnu većinu. Bilo je suviše neprincipijelne politike i strančarenja, a premalo rasprave o suštini problema, naročito u vezi sa bezbjednošću građana i novom programskom šemom lokalnog radija u kojoj je glavna novina – uvođenje jutarnjeg programa. Rezultat «pata-karte», nažalost.

Ipak je nešto i «odrađeno». Usvojeni su prijedlozi mjera za prevazilaženje teškog stanja u vodosnabdijevanju Mjesne zajednice Gračanica i Mjesne zajednice Pribava i prijedlozi mjera sanacije 42 klizišta na području opštine. Potvrđeno je i imenovanje sudije Lele Beganović za novog općinskog pravobranioca.

7.3.2001.

Nusret Helić novi načelnik općine Gračanica

Izabran je jednoglasnom odlukom vijećnika Općinskog vijeća i obećao da će nastaviti posao na stvaranju efikasnije i jeftinije općinske administracije, tehnički i kadrovski bolje opremljene, da će se zalagati za zakonitost u radu i ostvarivanje prava građana, da će biti u njihovoj funkciji, a ne u funkciji političkih stranaka, «pa ni svog SDP». Po svemu sudeći, slijedit će liniju svog prethodnika Senahida Šakovića, koji je 26.1.2001. godine izbran za predsjednika Vlade Tuzlanskog kantona.

Nusret Helić je rođen 1952. godine, po struci je pravnik, skoro čitav radni vijek proveo je u organima uprave, poznat je društveni i sportski radnik. Do sada je obav-

ljao dužnost šefa Službe za urbanizam, imovinske pravne poslove i katastar.

14.2.2001.

Smiješi li se sreća «Fortuni»

Prema podacima koje je prenio Radio-Gračanica, ova mnogoljudna gračanička firma tokom januara ostvarila je rekordnu proizvodnju – 73.000 pari obuće u vrijednosti od oko 400.000 DM. Za 800 radnika ove firme, po svemu sudeći, dolaze bolji dani: ugovorena je proizvodnja za tekuću sezonu (400.000 pari obuće u vrijednosti od 3 miliona DM), vraćeni tradicionalni kupci, konsolidovan menadžment i uhodan dobar proizvodni program.

16.3.2001.

Deveta sjednica Općinskog vijeća Gračanica: Budžet za 2001. godinu «težak» 4.897.925 KM.

To je za 6,45% više u odnosu na budžetski plan iz prethodne godine. Budžet će se «puniti» iz takozvanih «poreznih» prihoda (2.896.000 KM), neporeznih prihoda (1.393.750 KM) i tekućih potpora (608.175 KM). Na tekuće izdatke planirano je 4.644.925 KM, a na «čišćenje» obaveza iz prethodnog perioda 253.000 KM. Budžet je usvojen nakon višemjesečne rasprave koja je vođena pod pritiskom velikih restrikcija i podbačaja budžetskih prihoda i nedostatka sredstava za osnovne funkcije vlasti na svim nivoima, pa i na opštinskom. Budžetska «suša» i dalje traje i niko joj ne vidi kraj.

Osim Budžeta za 2001. godinu, vijećnici su usvojili i izvještaje o radu općinskih službi u prošloj godini i «poslali u raspravu» dva značajna dokumenta iz oblasti urbanizma: nacрта izmjene i dopune Regulačionog plana «Bazen III» i nacrt urbanističkog projekta «Tržnica i pijaca» Gračanica.

21.3.2001.

«Jadrina» radi punom parom

Da bi udovoljili rokovima i izbirljivom tržištu Švedske, Njemačke, Slovenije i Hrvatske, 287 radnika u ovoj firmi radi u dvije smjene.

Uvode se novi modeli namještaja, unapređuje kvalitet. Obim poslova u vrijednosti od 2,5 miliona KM za prva tri mjeseca bit će prebačen, plate su redovne...

23.3.1001.

Direktor «Vegafruit» Muharem Salihbašić – Menadžer godine Tuzlanskog kantona (2000)

Ovo prestižno priznanje, koje se dodjeljuje pod pokroviteljstvom Privredne komore Tuzla, ovoga puta došlo je u prave ruke. Salihbašić je stvorio «Vegafruit» u najtežim vremenima rata i progonstva, strpljenjem, stručnošću, upornošću. Radom.

30.3.2001. godine

Prvi međunarodni festival humora i satire «Gračanica 2001.»

U okviru ove ambiciozno koncipirane kulturne manifestacije, čiji je organizator Bosanski kulturni centar Gračanica, najavljeno je niz sadržaja humorističko-satiričnog karaktera, među kojima više pozorišnih komedija, monodrama, promocija knjiga i likovnih izložbi.

Manifestacija je otvorena komedijom Zlatka Jugovića «Đavolja posla», koju je pred gračaničkom publikom izvelo Gradsko pozorište Živinice, a nastavljena 1. aprila otvaranjem «Međunarodnog salona karikature» u holu Doma kulture Gračanica. Svoje radove izložili su karikaturisti iz Bosne i Hercegovine, Hrvatske, Srbije i još nekih zemalja.

5.4.2001.

Deseta sjednica Općinskog vijeća Gračanica: 2. juni, novi Dan Općine, 7. april, ponovo Dan oslobođenja

Dosadašnji Dan općine, 25. maj zadržan je u kalendaru značajnih događaja kao Dan odbrane općine Gračanica, a 7. avgust kao Dan pobjede na Visu.

Novi Dan općine vezuje se za prvo pojavljivanje srednjovjekovnog grada Sokola u historijskim izvorima (2.6.1429. godine).



Pri izjašnjavanju o novom kalendaru značajnih događaja, Općinsko vijeće nije bilo jedinstveno, što je posljedica nekvalitetnih priprema i izostajanja javne rasprave koju je zahtijevao Odbor za obilježavanje značajnih događaja i ličnosti kao predlagač tog dokumenta. Posebne rezerve ispoljene su oko prijedloga 2. juna kao novog Dana općine, i 7. aprila Dana oslobođenja. Izostajanje političkog konsenzusa oko ovih delikatnih pitanja ocjenjuje se kao nepotreban propust nove vlasti.

7.4.2001.

Obilježen Sedmi april – prvi put na opštinskom nivou, nakon nekoliko godina «pauze»

Pošto je u novi kalendar obilježavanja značajnih događaja «ubilježen» kao Dan oslobođenja općine u Drugom svjetskom ratu, nekadašnji Dan općine Gračanica, obilježen je skromnom svečanošću, prigodnim kulturno-umjetničkim i sportskim programom.

11.4.2001.

Počelo se vraćati srpsko stanovništvo Gornjeg i Donjeg Skipovca

Međutim, po «dolasku kući» naišlo je na mnogobrojne probleme, koji, inače, prate ovakve povratke širom Bosne i Hercegovine. Kako su ova sela locirana na međuentitetskoj liniji, takoreći na «ničijoj zemlji», daleko od saobraćajnica i većih centara, ti su povratnici gotovo zaboravljeni od svih, pa je veliko pitanje da li će uspjeti trajno opstati «kod kuće».

16.4.2001.

Proглашeni najbolji sportisti opštine Gračanica u 2000. godini

Sportista godine je Mustafa Kamarić, rukometaš ekipe «Gračanica indeks», sportistkinja godine je Alisa Sarajlić, članica Karate kluba «Bošnjak», sporstki kolektiv godine – Rukometni klub «Gračanica indeks». Direktor malonogometnog kluba «Kaskada» Nesib Okić proglašen je za najboljeg sportskog radnika, Muhidin Halilović, trener gračaničkih odbojkaša proglašen je za trenera godine, najbolji sportista invalid je Hasib Salkanović. Posebno priznanje dodijeljeno je Radio-Gračanici za emisiju «Sa sportskih terena» koju uređuje Hasan Čalić.

26.4.2001.

Jedanaesta sjednica Općinskog vijeća: u znaku izvještaja javnih preduzeća i ustanova i izgradnje «sportskih dvorana»

Uz neke konstruktivne prijedloge i primjedbe, Vijeće je usvojilo izvještaje o radu u prošloj godini: Doma zdravlja, Centra za socijalni rad, Dječjeg obdaništa Komunalnog preduzeća i Vodovoda. Usvojen je Program uređenja građevinskog zemljišta u 2001. godini i informacija o stanju narkomanije i maloljetničke delikvencije u prethodnoj godini.

Posebnu pažnju vijećnika privukla je informacija o dosadašnjim aktivnostima na izgradnji Sportske dvorane u Gračanici, koja je potpuno «zaribala». Iako je nastavak izgradnje te dvorane potpuno neizvjestan kao uostalom i buduća sudbina tog, za Gračanicu, prevelikog projekta, Vijeće je podržalo inicijativu Kompanije «Širbegović» i još nekih privrednih subjekata da izgradi manju sportsku dvoranu kod Druge osnovne škole.

13.5.2001.

Sjenina se vraća «sebi»

Ukupno je obnovljeno 230 bošnjačkih kuća u koje se vratilo oko 1.500 mještana ovog podtrebavskog sela. Još od 1992. godine, kada su pod pritiskom srpske soldateske morali napustiti svoje kuće, mnogi od njih privremeno utočište našli su na području gračaničke opštine. Povratak su pomogle opštinske i kantonalne vlasti iz Federacije BiH, te mnoge humanitarne organizacije kao što je World Vision» «Muslim Eid» i druge. Iako mnogo štošta nedostaje kao i u drugim povratničkim naseljima, ohrabruje činjenica da su Sjenjani zasijali na stotine dunuma svoje plodne zemlje i više nemaju nikakvih problema sa svojim komšijama Srbima.